

## TARDE NUESTRE – PAVIA = 2 A 1... 'A CAPOLISTE SE NE VEEEEEE'!

L'ha mann't Aldo "Diecipalazzine"  
lunedì 19 settembre 2011

Madòòòò&hellip; NICOLINE nuesta ha fatte &lsquo;nu gol probbie o novendatreeseme! Eheheh&hellip; le piacene le pavesine a Nicoline! E accussì osce, pe trende e trendune ame vingiute. ANTONAZZO e BREMEC fa ca mo stavene a MAI DIRE GOL. A pigghie ije! A pigghie tune! E &lsquo;u pallone se n&rsquo;ha sciute &lsquo;mborte sule sule! Aspèèèèè! &lsquo;U Tarde nuesta no&rsquo;nge ha capite cchiù ninde e ste pigghiamme &lsquo;n&rsquo;otre gol abbuene abbuene! &lsquo;U Mister nuesta ca prime s&rsquo;aveve vestute accome a &lsquo;nu cameriere. Po s&rsquo;ha vestute accome &lsquo;nu steward, piccè cu &lsquo;a cammisa vianghe se mmiskave cu quidde du PAVIA.

Cu ll&rsquo;otra squadre sciucave &lsquo;nu tarandine de Puzane: FALCO. Appena COLOMBINI l&rsquo;ha viste se n&rsquo;ha fuscite. Ehehehe! Pure le palumbe no&rsquo;nge stavene cchiù o cambè, sule ca stavene &lsquo;nu sbuene d&rsquo;ape. Ce sape a com&rsquo;è! Mah! O seconde timbe, CHIARETTI (&lsquo;u megghie) ha pareggiate cu &lsquo;nu belle gol brasiliane! &lsquo;U Tarde nuesta ha attaccate cu &lsquo;a capa sotto. Ha trasute GIRARDI e ha assute GUAZZO. Nemmanghe osce c&rsquo;è stato il guizzo di GUAZZO e pure quidde CUTRUPI no&rsquo;nge m&rsquo;ha piaciute proprie. Po ha trasute RUSSO e dritte e stuerte ha segnate. E accussì &lsquo;u lacovone ha scuffulate. Mene uagnùùù ca stame o prime poste! &lsquo;A capoliste se ne vèèèèèèè! Sule ca tenime &lsquo;u cambè ca pare &lsquo;u cambette ca stave rete a Concattedrale! Buche-buche! Uagnù! Stateve bbuene e Tuttapposte!